

經

義

述

聞

經義述聞第二十七

高郵王引之

爾雅中九十四條

齊中也 諄離也 適述也 疾齊壯也 枕頰充也  
婁暱亟也 剪齊也 饋餽稔也 矜苦也 潛溪  
測也 誥誓謹也 暖農夫也 蓋割裂也 支載也  
漠察清也 替滅也 髦選也 凌慄也 慄惑也  
猶若也 稱好也 坎銓也 宛隸也 隸力也  
獵虐也 師人也 詰鞏也 謀心也 振古也 綯  
絞也 烝塵也 宛閒也 眇眇也 曷益也 展適  
也 服整也 翌明也 振訊也 閱恨也 越揚也

懊恍也 廩靡也 訛言也 醜妬也 辟歷也

繩繩戒也 悞悞勉也 夢夢訥訥亂也 速速感感

惟迷鞠也 不過不蹟也不徹不道也 每有雖也

暨不及也 洵慄也 遼條口柔也威施面柔也 連

謂之縶 所以止屣謂之閤 三達謂之劇旁 五達

謂之康 甌甌謂之瓠 紉謂之救律謂之分 輿革

前謂之鞞 環謂之捐 鑣謂之鐵載轡謂之轡 款

足者謂之鬲 百羽謂之緝 旄謂之龍 不律謂之

筆 以屨者謂之珧 革中絕謂之辨革中辨謂之鞞

在戊曰箸雍 風與火爲屯 咻謂之桺 彗星爲

檣槍 錯革鳥曰旗 其名謂之鰈 邑外謂之郊郊  
外謂之牧牧外謂之野野外謂之林林外謂之坳 方  
邱胡邱 當途梧邱 水出其左營邱 邱背有邱爲  
負邱 望厓洒而高岸 夷上洒下不瀆 厓內爲隩  
外爲隈 畢堂牆 渼爲厓窮續汜谷者激 山小而  
高岑 重巖隙 左右有岸厓 山上有水埒 汎泉  
穴出穴出仄出也 瀟大出尾下 以衣涉水爲厲  
繇膝以下爲揭 紼鞮也

釋言

齊中也

郭引釋地曰距齊州以南引之謹案呂刑曰天齊于民  
馬注齊中也管子正世篇曰治莫貴於得齊謂得中也  
列子周穆王篇曰四海之齊謂中。央之國皆謂中爲齊  
冢大人曰人臍居腹之中。央故謂之臍臍者齊也。士喪  
禮下篇齊三采鄭注曰齊居桺之中。央疏曰以其言齊  
若人之齊亦居身之中央也莊子達生篇與齊俱入釋  
文。司馬云齊回水如磨齊也。是齊爲物之中央也漢書  
郊祀志齊所以爲齊。以天齊也蘇林曰當天中央齊也  
封禪書索隱引解道彪齊記云臨菑城南有天齊淵言  
如天之腹齊也天中之爲天齊亦猶中州之爲齊州矣

謠離也

郭曰謠見詩邢曰小雅巷伯云哆兮侈兮成是南箕鄭箋云因箕星之哆而又侈大之是也引之謹案哆侈皆張大之貌非離析之義郭言謠見詩不知何指邵曰穀梁僖四年傳云於是哆然外齊侯也哆然離散之貌謠哆音義同於義爲長說文謠離別也周景王作洛陽謠臺徐鍇曰謠臺猶別館也別館與離宮同義故曰謠離別也家大人曰荀子王霸篇曰四方之國有侈離之德侈亦與謠同。

適述也

毛鄭詩考正曰案文選注引韓詩薛君章句云聿辭也春秋傳引詩聿懷多福杜注云聿惟也皆以爲辭助詩中聿曰適三字互用爾雅適自也述也禮記引詩聿追來孝今詩作適七月篇曰爲改歲釋文云漢書作聿角弓篇見睨曰消釋文云韓詩作聿劉向同毛傳於歲聿其莫釋之爲遂於聿脩厥德釋之爲述箋於聿來胥宇釋之爲自於我征聿至聿懷多福適駿有聲適求厥甯適觀厥成適追來孝竝釋之爲述今考之皆承明上文之辭耳非空爲辭助亦非發語辭而爲遂爲述爲自緣辭生訓皆非也說文有吹字注云詮詞也从欠从口曰

亦聲引詩吹求厥甯然則吹蓋本文省作口同聲假借  
用聿與適詮詞者承上文所發端詮而釋之也引之謹  
案戴以詩之聿曰通三字爲詮詞善矣然適訓爲述又  
訓爲循見釋詁自是古義如此非爾雅之緣詞生訓也康  
誥曰今民將在祗適乃文考馬注通述也釋訓曰不通  
不蹟也小雅河水篇念彼不蹟毛傳不蹟不循道也不通卽邶風日月篇之  
報我不述毛傳述循也故孫炎注釋詁云通古述字凡若此  
者固皆不得以詮詞釋之

### 疾齊壯也

郭曰壯壯事謂速也齊亦疾邢曰急疾齊整皆於事敬



速彊壯也邵曰壯本或作莊。大雅云思齊大任。毛傳齊莊也。疏以爲釋言。文家大人曰。敏速與彊壯不同義。邢合爲一。非也。疾齊壯也者。壯與齊皆疾也。故郭曰。壯壯事。謂速也。齊亦疾。莊子徐無鬼篇。百工有器械之巧。則壯。李頤注曰。壯猶疾也。齊策曰。韓子盧者。天下之疾犬也。交選求自試。表注。後漢書馮衍傳注。引此並作壯犬。是壯爲疾也。釋詁曰。齊疾也。荀子脩身篇曰。齊給便利。史記五帝紀曰。幼而徇齊。集解。齊速也。言聖德幼而疾速也。索隱引尚書大傳曰。多聞而齊。給。鄭注云。齊疾也。春秋衛世叔齊字。疾是齊爲疾也。齊又爲齊莊之莊。齊

與整齊義本相通。故祭統曰：齊之莊與壯古字通。鄭風為言齊也。齊不齊以致齊者也。莊與壯古字通。鄭風君子。借老箋：顏色之莊。釋文曰：莊本又作壯。音語趙簡子問於壯。壯在舊音曰：莊音莊。檀弓：衛有大史曰：柳莊。漢書古今人表作柳莊。莊子天下篇：不可與莊語。釋文曰：莊一本作壯。史記高祖功臣侯者表：莊敬侯許倩徐廣曰：莊一作。

枕頰充也

引之謹案頰古讀若入戶奉局之局。小雅無將大車篇不出于頰與冥為韻。集韻局頰竝涓熒切。是其證也。頰局同聲故字亦相通。淮南俶真篇曰：處小隘而不塞。橫局天地之間而不窳。昭二十一年左傳注：窳細不滿也。主術篇曰：橫局四方而不窳。今本窳作窮。乃後人所改。辯見讀書雜誌。橫局者充塞之謂。荀

子賦篇曰。充盈大宇而不究。入卻穴而不偏。義與淮南同也。此文訓頌爲充。非訓爲允。邢引說文。頌火光也。邵引釋詁。頌光也。皆失之。

婁古屢字 暱反 亟墟記 也

郭曰。親暱者亦數。色角反。亟亦數也。引之謹案。亟與數同。

義。親暱與數異義。而云親暱者亦數。則鑿矣。今案婁爲亟數之亟。暱爲相親愛之亟。方言。亟愛也。東齊海岱之間曰亟。自閩而西。秦晉之間。凡相敬愛。謂之亟。字或作極。廣雅。極愛也。亟訓爲愛。相愛卽相親暱。故云暱亟也。

剪齊也

家大人曰。士喪禮記曰。馬不齊髦。鄭注。齊。翦也。

饋餽稔也

郭曰。今呼餐飯爲饋。饋熟爲餽。

力又反。

引之謹案。漢書律

厯志曰。留孰於酉。

孰。古熟字。

留餽古同聲。故義皆爲熟。

矜苦也

引之謹案。莊子在宥篇曰。愁其五藏以爲仁義。矜其血氣以規法度。矜者。苦也。矜其血氣。猶孟子言苦其心志耳。爾雅直訓矜爲苦。而郭云可矜憐者。亦辛苦其失也迂矣。

潛渙測也

家大人曰莊子田子方篇曰上闕青天。下潛黃泉。是潛爲測也。商子禁使篇曰淡淵者。知千仞之淡。縣繩之數也。淡淵測淵也。列子黃帝篇曰。彼將處乎不淡之度。而藏乎無端之紀。不淡不測也。張湛注淡當作淫非是。是淡亦爲測也。

### 詒誓謹也

家大人曰謹者戒敕之謂。韓子十過篇知伯曰。吾與二主約謹矣。外儲說左篇李悝警其兩和曰。謹警敵人旦暮。且至擊女。皆謂相戒敕也。鹽鐵論世務篇引詩云。詒爾民人。謹爾侯度。

明涂禎本如是與詩攷所引合張之象本詒譌作詰說苑脩文

篇引詩云。告爾民人。謹爾侯度。詰告竝與。謹同義。故下文曰。用戒不虞也。漢書刑法志以刑邦國。詰四方。顏師古注曰。詰。字或作詰。詰。謹也。文王世子曰。曲藝皆誓之。鄭注。誓。謹也。說文曰。誓。約束也。周官大宰曰。掌百官之誓戒。士師曰。以五戒先後刑罰。一曰誓。二曰詰。或言謹。或言戒。或言約束。其義一也。引之謹案。楚語曰。近臣諫遠臣謫。與人誦以自詰也。自詰。亦謂自戒敕也。

暖農夫也

引之謹案。暖。長也。田暖農之長。率人曰夫。若大夫之夫矣。凡經傳言準夫。言牧夫。言嗇夫。言馭夫。言膳夫。言宰

夫皆率人之義故郊特牲曰夫也者夫也夫也者以知  
帥人者也周頌噫嘻篇率時農夫鄭箋以農夫爲主田  
之吏義本爾雅也下文曰髦選也髦俊也此文曰髦士  
官也駿農夫也皆出眾之稱故皆以俊髦連言之。

蓋割裂也

郭曰蓋未詳錢曰鄭注緇衣云割之言蓋也正義謂割  
蓋聲相近古者聲隨義轉聲相近者義亦相脗尚書割  
申勸甯王之德割有蓋義爾雅蓋割同訓蓋有割義皆  
取同聲之轉也引之謹案錢說是也釋文曰蓋舍人本  
作害害與蓋字相通呂刑曰鰥寡無蓋謂鰥寡無害也

孟子萬章篇謨蓋都君謂謀害舜也害與割字亦相通  
廣雅。害。割也。堯典。湯。湯。洪水方割。某氏傳。割。害也。天誥。天降割于我家。釋文。割。馬本作害。割之爲蓋  
猶害之爲蓋也。害割蓋三字聲義竝相近。故竝得訓爲  
裂。

支載也

郭曰。未詳。邵曰。王煦曰。淮南齊俗訓云。金之性沈託之  
於舟上。則浮。勢有所支也。家大人曰。道藏本淮南支作  
枝。載通作戴。支之言。故閭也。淮南說林篇冠則戴。枝之  
今本枝。譌作致。辭見讀書雜誌。文子上德篇。枝作枝。此云。支載也。廣雅  
云。故閭載也。其義一而已矣。



漠察清也

樊曰漠然清貌。家大人曰莊子。知北遊篇曰澹而靜乎。漠而清乎。是漠爲清也。昭二十八年左傳。德正應和曰莫。杜注曰莫然清靜。莫與漠通。大戴禮子張問入官篇曰。水至清則無魚。人至察則無徒。邵有文選高唐賦曰。九竅通鬱。精神察。今本察下衍滯字。見讀書雜誌文選下。是察爲清也。察訓爲清清。亦訓爲察。呂刑曰。明清于單辭。明清明察也。故後漢書明帝紀曰。明察單辭。王藻曰。視客清明。鄭注。察於事也。

替滅也

邵曰。大雅召閔云。胡不自替。引之謹案。召閔傳曰。替廢也。箋曰。女何不自廢。退使賢者得進。則不得訓替爲滅也。今案魯語。令德替矣。晉語。君之家嗣其替乎。韋注竝曰。替滅也。桓二年左傳。兄其替乎。亦當訓爲滅。

### 髦選也

引之謹案。士之選。謂之髦。烝我髦士。髦士攸宜。是也。選士亦謂之髦。譽髦斯士。是也。譽髦斯士。選斯士也。譽與古字通。與者語詞耳。說見毛詩

### 凌慄也

郭曰。凌慄戰慄。釋文曰。案郭注意當作凌。今本凌謗作陵。下引埤蒼

慄慄也。又譌作凌。今據明葉林宗影宋本釋文改。埤蒼云。慄慄也。樊注作凌冰

凜也。錢曰。此當從樊。允義。慄當爲凜。詩二之日凜烈說

文作凜。凜凜者冰寒也。家大人曰。此仍當從郭義釋

文。不言各本有作凌者。則舍人李孫本皆作凌可知。且

不言樊本作凌而言樊注作凌。則正文仍作凌可知。又

慄爲戰慄之慄。各本皆無異文。不當改慄爲凜也。古者

謂戰慄爲慄。淮南兵略篇曰。諸侯莫不懼慄。說苑善說

篇曰。登高臨危。目不眴而足不陵。漢書楊雄傳。馳間閣

而人凌兢服虔注曰。凌兢。恐懼貌也。見文選。甘泉賦注。又虎豹

之凌。違顏師古注曰。凌。戰栗也。遽惶也。張衡西京賦。百

禽凌遠薛綜注曰凌猶怖也邊促也

凌凌凌陵古通用此用據遠古通用

皆郭注凌據戰慄之證卑蒼訓凌爲慄義亦本於爾雅

### 慄慄也

引之謹案慄讀爲蹙慄與栗通孟子引書夔夔齊栗趙

注曰敬慎戰懼也桓六年左傳嘉栗旨酒杜注曰栗謹

敬也哀公問孔子蹴然辟席鄭注曰蹴然敬貌

蹴與蹙同是

栗與蹙皆敬謹之義也漢書楊惲傳不寒而栗顏師古

注曰栗竦縮也小雅節南山篇蹙蹙靡所騁鄭箋曰蹙

蹙縮小之貌又儀禮古文縮字皆作蹙是栗與蹙皆局

縮不申之義也燕禮記凡公所饒皆栗階鄭注曰栗蹙

也謂越等急趨君命也。訓栗爲蹙，正用爾雅之文。廣雅曰：迫蹙急也。是栗與蹙皆急迫之義也。栗蹙同義，故訓栗爲蹙。作感者，借字耳。非謂憂感也。感與蹙古聲相近。感通作戚，小雅小明篇自詒伊戚。與奧蹙菽宿覆爲韻。餘見唐韻。正故蹙通作感。禮器不然則已蹙。釋文蹙本又作感，是其證也。郭誤以感爲憂感之感，而曰戰慄者憂感，則迂回而失其本指矣。

猶若也

郭曰：詩曰寔命不猶，引之謹案猶爲若似之。若又爲若或之若。內則曰子弟猶歸器衣服衮衮車馬，則必獻其上而後敢服用其次也。鄭注曰：猶若也。襄十年左傳曰：

猶有鬼神於彼加之言若有鬼神也

稱好也

釋文稱尺證反引之謹案考工記輪人進而砥之欲其

肉稱也鄭注曰肉稱宏殺好也是稱為好也肉稱猶言

肉好樂記曰寬裕肉好是也

鄭注肉肥也史記樂書集解引王肅注曰肉好言音

之洪美荀子禮論篇曰使外生終始莫不稱宐而好善義

亦同也

論衡逢遇篇曰形佳骨嫺皮嬌色稱定賢爾雅篇曰骨體嫺麗面色稱嬌稱皆謂好也

直訓稱為好而郭云物稱人意亦為好則失之迂矣

周語君子不自稱也乃

稱譽之稱尤非此義

坎銓也

樊曰坎卦水也水性平銓亦平也

見宣十二年左傳正義

郭曰易

坎卦主法法所以銓量輕重引之謹案爾雅非釋易之

書不得旁涉卦象且水性雖平然書傳無訓水為銓者

況為水之坎乎法雖銓量輕重然書傳無訓法為銓者

況主法之坎乎樊郭二家之注皆曲說也今案坎當為

次字形相侶而誤李善魏都賦注引杜預左傳注曰銓

次也蓋哀三年傳外內以悛杜注悛次也悛字本又作

銓故李善引之也

廣韻銓悛並此緣切

玉篇云銓亦作銓次也廣

韻同銓可訓為次次亦可訓為銓故曰次銓也

宛隸也

隸俗作肆

郭曰。輕窕者好放肆。家大人曰。輕窕者好。放肆則輕窕  
非放肆也。爾雅何以直訓窕爲肆乎。予謂窕肆皆謂淡  
之極也。說文窕淡肆極也。從宀兆聲。是極淡爲窕也。昭  
十二年左傳注曰。肆極也。周語晉語注及呂覽淮南兵  
略篇。山高尋雲霓。淡肆無景。今本脫霓淡二字。高注  
辯見讀書雜誌。曰。肆極也。極谿之淡不。見景是極淡爲肆也。故曰。窕肆  
也。

肆力也

郭曰。肆。極力。引之謹案。爾雅訓肆爲力。不當加極字以  
釋之。今案肆與肆同。邶風谷風篇。旣詒我肄。毛傳曰。肄



勞也。字本作勩。小雅兩無正篇。莫知我勩。釋詁及毛傳  
並曰勩勞也。此訓爲力者。力亦勞也。淮南主術篇曰。民  
貧苦而忿爭。事力勞而無功。秦族篇曰。夙興夜寐而勞  
力之。是力與勞同義。大雅烝民篇。威儀是力。箋曰。力猶  
勤也。勤亦勞也。宛肆也。肆力也。肆與肆聲相近。故連而  
及之。凡釋言篇中。如憊曾也。增益也。夢隱也。優咍也。光  
域也。肇敬也。之屬。皆以聲相近而并及之。肆肆古字通  
故。又俗肆爲肆矣。周官小宗伯。肆儀爲位。故書肆爲肆。  
玉藻。肆束及帶。注。肆讀爲肆。曲禮。大  
夫與士肄。內則。請肄簡諒。文四年左  
傳。臣以爲肄業及之也。釋文。並作肆。

獵虐也

家大人曰。吳語曰。今大夫國子興其眾庶以犯獵。吳國之司徒。韋注獵虐也。今本虐譌作震。辯見吳語。襄十八年左傳曰。陵虐神主。楚辭九歌曰。凌余陳兮。獵余行。獵與通。凌獵猶凌虐也。故郭云。凌獵暴虐。

師人也

引之謹案。人者眾也。春秋隱四年。衛人立晉公。羊傳曰。其稱人何。眾立之之辭也。穀梁傳曰。衛人者。眾辭也。菜誓曰。人無譁。鄭注。人謂軍之士。眾荀子。儒效篇曰。塗之人。百姓積善而全。盡謂之聖人。謂塗之眾。百姓也。又王制。王霸議兵三篇。竝曰。下之人。百姓。亦謂下之眾。百姓。

也史記鄒陽傳人無不按劍相眄者漢書人作眾是人  
卽眾也釋詁曰師眾也此曰師人也其義一而已矣故  
郭曰謂人眾。

𡗗羣也

郭曰𡗗然堅固釋文𡗗苦角反邢曰𡗗苦學切當從告  
說文別有𡗗苦八切石堅也邵仍依舊本作𡗗說文𡗗  
石聲從石告聲段氏若膺注曰爾雅邢疏剖別甚精釋  
文苦角反故邢曰苦學切四覺韵字多從屋韵轉入告  
聲古音在屋韵是以𡗗轉入覺韵據陸氏反語則知陸  
本作𡗗不作𡗗玉篇廣韵皆曰𡗗苦角切𡗗恪八切集

韻類篇克角一切內亦有砮無砮皆可證而釋文注疏  
唐石經皆譌作砮則與陸氏苦角之音不合矣且砮與  
鞏音相近以尤韻與東韻近而砮與鞏不相隔也砮斷  
無苦角之音砮斷無苦八之音此一定之音理江賦曰  
幽澗積阻砮砮砮砮砮砮砮砮也古音在屋部砮砮亦  
疊韻也古音在藥部學者不知古音不可與讀古者此  
也五經文字曰砮口八反又苦角反見爾雅知張時爾  
雅已誤而張於砮下列口八苦角二反是不知古音也  
或曰何不正音之苦角爲苦八而謂正文字誤乎曰音  
義積古相傳陸氏多從舊當陸時字固未誤也引之謹

案告吉二字經傳中往往譌潤告字從牛。隸書牛字或作吉。故告字或作吉。其吉相似傳寫往往互譌。緇衣引尹吉曰云云。鄭注。吉當爲告。婦象傳后以施命誥四方。釋文。誥鄭作誥。漢書刑法志。誥四方。師古曰誥字或作誥。廣韻。皓苦角切。固也。集韻。鞏也。並與爾雅合。今依段說訂正。

謀心也

引之謹案。心者思也。洪範五事。五曰思。漢書五行志作五曰思。心今本無心字。乃後人依古文尚書刪之。辯見讀書雜誌。又曰思。心之不

容。是謂不聖。說文曰思。容也。廣雅曰。心。容也。心亦思也。

楚辭九章曰。糾思。心以爲纒兮。緇愁。苦以爲膺。思。心同。義。愁。苦。

同。又曰。憐思。心之不可懲兮。呂氏春秋精諭篇曰。勝書

能以不言說而周公且能以不言聽紂雖多心弗能知  
矣言紂雖多思慮不能知周之伐已也高注紂多惡徐周之心失之  
廣史記五帝紀音義引墨子曰年踰五十則聰明心慮  
不佞通矣心慮卽思慮是心與思同義釋詁曰惟慮謀  
也又曰惟慮思也又曰靖謀也方言曰靖思也是思與  
謀亦同義爾雅訓謀爲心心卽思也郭誤以爲身心之  
心而釋之曰謀慮以心則迂回而失其本指矣

### 振古也

郭曰詩曰振古如茲猶云久若此周頌載芟傳曰振自  
也箋曰振亦古也言脩德行禮莫不獲報乃古古而如

此所由來者久非適今時引之謹案。古古如此殊爲不  
詞。蓋爾雅本作振自也。自字古文作𠂔。形與古相似。因  
譌爲古。爾雅之振自也。正釋詩之振古。如茲毛傳之振  
自也。卽本於爾雅。韋昭注晉語。如淳注漢書高紀。竝云  
振起也。凡事之所起卽事之所自。故振又訓爲自。振古  
如茲。猶甫田之言自古有年也。鄭所見爾雅本。自字始  
譌作古。故據之以易傳。郭從鄭義。故曰振古如茲。猶云  
久若此不。知爾雅古字乃自字之譌。古如茲。固不若  
自古如茲之文從字順也。今訂從毛傳。

絢紋也

郭曰。糾絞繩索引之謹案。絢絞卽是繩索。非謂糾絞繩索也。辯見前宵爾索綯下。

烝塵也

郭曰。人眾所以生塵埃。家大人曰。郭訓烝爲眾。眾與塵埃不同義。故曲爲之說曰。人眾所以生塵埃。其失也鑿矣。幽風東山篇烝在桑野。毛傳曰。烝賓也。鄭箋曰。蠋蛸。蛸然特行。失處桑野。有似勞苦者。古者聲賓填塵同也。小雅常棣篇烝也。無戎。毛傳曰。烝填也。箋曰。當急難之時。雖有善同門來。久也。猶無相助已者。古聲填賓塵同。是塵訓爲久。非謂塵埃也。故孫注曰。烝。物久之塵其意。



蓋曰此塵字非塵埃之塵乃物久之塵也釋詁曰塵久也孫彼注曰塵居之久義與此注同而郭彼注亦誤以爲塵埃矣又案鄭康成于政陳于茲正義曰釋詁云塵久也孫炎曰塵居之久久則生塵矣古者塵陳同也故陳爲久之義自久則生塵以下皆孔氏申明上文之詞非孫注原文也孔爲郭注所惑故有久則生塵之說非孫義也邵氏誤以久則生塵矣五字爲孫注又未解此注物久之塵四字之義而以爲物久則生塵遂謂景純之誤本於叔然何讀古之不審也。

宛間也

郭曰窈窕閒隙

此注誤。

邢曰詩周南關雎云窈窕淑女毛

傳云窈窕幽閒邵曰郭氏注方言云窈言閒都也

此注不誤

家大人曰郭說迂曲邢邵說是也窈爲幽閒之間又爲閒暇之間司馬法嚴位篇云凡戰之道力欲窈氣欲閒又云擊其倦勞避其閒窈。

### 眇眇也

郭曰謂眇絕邢曰周頌載芣云徂隰徂眇毛傳曰眇場也則眇謂地畔之徑路也至此而易之故以眇爲場易則地絕故得爲眇邵曰上文云眇致也釋詁云眇盡也眇又訓眇以聲轉爲義皆假借字也家大人曰眇無眇

絕之義。邢曲爲之說。非也。邵以爲假借字。近之。然未言何字之假借。子謂珍。珍聲相近。蓋卽珍之借字。𦵏。𦵏聲相近。卽𦵏之借字也。釋詁曰。珍。美也。儒行。席上之珍。以待聘。鄭注曰。珍。善也。士昏禮記辭。無不。𦵏。燕禮。寡君有不。𦵏之酒。聘禮。不。𦵏。先君之祧。注並曰。𦵏。善也。廣雅曰。𦵏。美也。是珍。𦵏。同訓爲善。又同訓爲美。而珍與𦵏。古聲亦相近。說苑脩文篇曰。使某奉不珍之琮。不珍之履。不珍。卽不。𦵏。故曰。珍。𦵏也。邶風新臺篇。蓬篠不。𦵏。箋曰。𦵏當作𦵏。𦵏。善也。燕禮注曰。古文𦵏皆作。𦵏。是𦵏。𦵏。古字通。犬雅雲。漢篇不。𦵏。禋祀。錢氏荅問亦以。𦵏。爲𦵏。

曷益也

郭曰。益。何不。家大人曰。益之爲何不。常訓也。而又訓爲何。故廣雅曰。益何也。楚辭九歌。益將把兮瓊芳。王注曰。益何也。言靈巫何持乎。乃復把玉枝以爲香也。今本作益何不。字乃後人所加。注言靈巫何持則訓益爲何明矣。而今本文選所載王注。又改何持爲何不。持以從五臣之謬解。蓋後人但知益爲何不。而不知其又訓爲何。故紛紛妄改耳。管子霸形篇。仲父益不當言。謂何不。讞言也。當言。卽讞言。說見廣雅疏證黨善也下。戒篇。益不出從乎。君將有行。尹知章注曰。君將有行。何不。出從乎。益何也。今本作益何不也。字亦後人所加。後廢篇作公將有行。胡不送公。胡不。卽益不。莊子盜跖篇。益不爲行。釋夾曰。益何也。勸何不爲德行。今本作益

何不也。不字。又莊子養生主篇曰。善哉技蓋至此乎。言亦後人所加。

技之善何至於此也。秦策曰。勢位富貴蓋可忽乎哉。言

何可忽也。

稽少孫續史記三代世表曰。豈可以忽乎哉。

管子小稱篇曰。闔不

起爲寡人壽乎。莊子。徐無鬼篇曰。闔不。亦問是已。闔不

何不也。蓋闔竝與盍同。曷之爲何常訓也。而又訓爲何

不。湯誓曰。時日曷喪。唐風有杜之杜曰。中心好之曷飲

盍之曷皆謂何不也。

說者皆訓爲何失之。

曷爲何而又爲何不。盍

爲何不而又爲何聲近而義通也。故爾雅曰。曷。盍也。學

者失其義久矣。

曷盍聲近而義通。故月令之賜且釋。文作曷且坊記作盍且。

展適也。

引之謹案周官肆師展犧牲鄭注曰展省閱也檀弓展

墓而入鄭注曰展省視之

邵謂展墓猶曲禮言適墓又引左氏莊二十七年傳天子

非展義不巡守皆失之。是省視謂之展也又案文王世子曰適饌

省醴適展也適饌猶言視具內則曰佐長者視具是也

適與省同義故鄭注曰親視其所有

正義曰天子親適陳饌之處省視醴

酒案陳饌之處謂之饌爲不詞矣

是省視謂之展亦謂之適也爾雅直

訓展爲適而郭云得自申展皆適意則失之迂矣。

### 服整也

邢曰謂整治也引周南葛覃云服之無斃邵引魏風葛

屨云好人服之鄭箋竝曰服整也引之謹案邢邵說是

也郭曰服御之令齊整則服御非齊整也爾雅何以訓服爲整乎。又案服者良之俗字也。說文曰良治也。經傳通作服治。亦謂整治也。故葛覃葛屨箋竝云整治。

### 翌明也

郭曰書曰翌日乃瘳引之謹案翌爲明日之明又爲昭明之明。皋陶謨夙夜浚明有家。史記夏本紀作蚤夜翊明。有家作翊者蓋今文尚書也。翊與翌同。頊亦明也。古人自有被語耳。續漢書郡國志左馮翊注引決錄注曰翊明也。

### 振訊也

家大人曰廣雅振訊動也。幽風七月日。六月莎雞振羽。毛傳莎雞羽成而振訊之。莊八年公羊傳注振訊士眾。邢引曲禮振書端書邵引左氏昭十八年傳振除火災皆未確。

閱恨也

郭曰相怨恨陸曰恨孫炎作很云相很戾也錢曰恨乃得之譌見詩毛氏傳而郭乃以相怨恨爲說誤矣邵說與錢略同又曰左傳疏僖二十四年引李巡云閱相怨恨也是李本作恨郭注從李家大人曰錢邵說是也閱訓爲很故其字從門非謂相怨恨也然很與恨古字亦通晏子春秋雜篇曰君歡然與子邑子必不受以恨君何也



恨與很同吳語。今王將很。新序節士篇曰。嚴恭承命。不天而伐齊。韋注。很。違也。以身恨君。漢書匈奴傳曰。右賢王與漢吏相恨。外戚傳曰。貴人獨不可一見上。屬託兄弟耶。何爲恨上如此。恨竝與很同。孫本作很。正字也。李郭本作恨。俗字也。但不當訓爲怨恨耳。

### 越揚也

郭曰。謂發揚也。邵曰。周語云。汨越九原。案汨越皆治也。說見周語。晉語云。夫人美於中。必播於外。而越於民。韋注俱云。越揚也。家大人曰。周語以揚沈伏而黜散越。淮南俶真篇。暴行越智於天下。高韋注竝曰。越揚也。共彖辭。揚于王庭。鄭

注曰揚越也揚越一聲之轉故發揚之轉為發越司馬相如

上林賦飛揚之轉為飛越劉琨勸進表播揚之轉為

播越昭三十九年左傳將焉用是播揚焉激揚之轉為激

越王風揚之水傳揚激揚清揚之轉為清越聘義申之

以長注越猶揚也荀子法行故大斧謂之鉞亦謂之揚

篇作即之其聲清揚而遠聞

懷忼也

郭曰謂愛忼引之謹案鄒語曰申呂方彊其懷愛大子

亦必可知也懷與懷同愛懷一聲之轉愛之轉為懷猶

優與暖之轉為與釋名曰懿優也言與優也老子曰道

者萬物之奧王弼注奧猶隱也可得底蔭之辭皆其例也。愛懊忼竝一聲之轉。或言懊愛或言愛玩其義一也。玩與忼同。

### 廩廩也

釋文廩息淺反。廣雅曰廩倉也。孫炎云廩藏穀鮮絜也。舍人云廩少鮮也。郭云或說云卽倉廩所未詳。引之謹案說文無廩字。自漢以前亦無謂倉廩爲廩者。舍人本作鮮訓廩爲少鮮是也。文十三年公羊傳羣公廩何注曰廩者連新於陳上財令半相連爾疏曰廩謂全是故穀但在上少有新穀財得相連而已。故謂之廩廩者希

少之名

以上公羊疏也

少與鮮同義故爾雅訓廩爲鮮也鄭注

易坤卦引公羊傳作羣公謙

見小雅采芣正義謙音廉今本謙譌作廉依毛詩注

疏按勘記改

謙之言廉也廉亦約少之名大元有少以象謙

其詞曰物謙然能自戡謙然者約少之貌義與廩同也然則廩者鮮少之名故訓廩爲鮮作廩者因廩字而誤加广耳廣雅訓廩爲倉卽因此而誤若爾雅以廩爲倉則當在釋宮不當在釋言矣藏穀鮮絜之注又從爲之辭景純言未詳蓋不信叔然之說也

### 訛言也

家大人曰言非言語之言乃言問之言言卽問也故郭

曰相問訊。廣雅曰言問也。聘禮曰若有言則以束帛。鄭注有言有所告請若有所問也。曲禮曰君言不宿於家。鄭注言謂有故所問也。曾子問曰召公言於周公。鄭注爲史佚問哀公。問曰寡人願有言然。冕而親迎不巳重乎。願有言願有問也。昭二十五年左傳曰叔孫氏之司馬馮戾言於其眾曰若之何。言於其眾問於其眾也。史記合公傳曰臣意言王曰才人女子豎何能言。玉問王也。周官小司寇曰用情訊之。鄭注訊言也用情理言之。冀有可以出之者。言之問之也。言與問同義。故或謂之言問。漢書賈誼傳曰臣聞聖主言問其臣而不自造事。

言亦問也。連稱言問者。古人自有複語耳。顏師古注欲發言則問其

臣分言問爲二義。朱之。周官冢人言鸞車象人注。鄭司農云。言言

問其不如法度者。犬祝言何人注。鄭司農云。何人主散

復梯。犬祝主言問其具梯物。小雅出車篇。執訊獲醜。鄭

箋曰。訊言也。執其可言問所獲之獸以歸。犬雅皇矣篇

執訊連連。箋曰。訊言也。執所生得者而言問之。皆以言

問二字連文言。與問訊同義。故曰訊言也。而邢疏云。訊

問以言。邵云相問以言。又引曾子事父母篇。弗訊不言

則皆誤以言爲言語之言矣。

覲姑戶刮戶括二反也

舍人曰覲擅也

釋文曰。謂自專擅之貌。家大人曰。一曰。諸書無訓覲為擅者。擅字疑有誤。

面貌也。孫李竝曰。覲人面姁然也。郭義與孫李同。家大

人曰。今人以覲為面慙貌非也。說文覲人面兒也。

今本

兒。譌作面見。案舍人曰。覲面貌也。孫李亦曰。覲人面姁

然也。越語注曰。覲面目之貌。是覲為人面貌也。小雅何

人斯正義引說文覲面見人。亦是人面兒之姁而覲也。

譌說文繫傳及段氏注。皆誤解覲字。今訂正。姁而覲也。

爾雅訓覲為姁。說文訓姁為面覲。其義一也。今本面覲

譌作面醜。何人斯釋文引說文姁面醜也。亦後人據誤

本說文改之。今據何人斯正義及邢疏所引訂正。又案

說文姁好也。齋材也。姁面覲也。姁直好兒。姁字在姁齋

姁之間。則其義亦與姁相近。故何人斯。即孫李所云人

面姁然也。然則覲與姁皆人面之貌。而非面慙貌。明矣。

小雅何人斯篇為鬼為蜮。則不可得有覲面。且視人罔

極。毛傳曰：覲，妬也。鄭箋曰：使女爲鬼爲蜮也，則女誠不可得見也。妬，然有面目。女乃人也，人相視無有極，時終必與女相見，是覲爲人面目之貌。故對鬼蜮言之，若以覲爲面慙，則與詩意相遠矣。又越語：余雖覲然而人面哉。吾猶禽獸也。韋注曰：覲，面目之貌，是覲爲人面目之貌。故對禽獸言之。若以覲爲面慙，則又與覲然人面之文不合矣。又後漢書樂成靖王黨傳：安帝詔曰：蓂有覲其面而放逸其心，意亦與越語同言。蓂雖覲然人面而放逸其心，實與禽獸無異。下文風淫于家，娉取人妻，是其事也。李賢不達，乃云覲，妬也。言面妬然無媿，則誤解。



覲字并誤解姁字矣。又案方言。懞慙也。荆楊青徐之間曰懞。此與有覲面目之覲異義。而左思魏都賦曰。有覲瞽容。神藻形茹。任昉彈曹景宗奏曰。惟此人斯有覲面目。玉篇亦曰。覲慙兒則皆誤。以覲爲懞矣。總之覲爲人面目之貌。或以爲慙。或以爲無媿。皆非也。自後人誤解覲字。而詩之有覲面目。國語之覲然人面。爾雅之覲姁也。義皆不可通矣。又案方言曰。獫楚郎或曰姁。又曰。姁獫也。江州之謂凡小兒多詐而獫。或謂之姁郭。彼注皆曰言黠姁也。方言姁字。自是黠姁之義。非爾雅覲姁也。之姁。而釋文引之以釋爾雅誤矣。臧氏用中爾雅漢注。

又以引方言者為孫炎注則誤之又誤也。

### 辟歷也

郭曰未詳引之謹案辟與𡗗同歷與厯同說文𡗗必益

治也從辟井爾雅辟法也說文刑字注引易曰井者法也

周書曰我之不𡗗今書金縢作我之弗辟文六年左傳

曰制事典正法罪辟獄刑董連逃由質要治舊滂杜注

辟猶理也理亦治也說文又曰厯音治也從厂厯音聲

是𡗗厯皆治也作辟歷者借字耳辟歷亦疊韻字

### 釋訓

繩繩戒也

邢引大雅抑篇云子孫繩繩邵引周南螽斯云宥爾子  
孫繩繩兮毛傳繩繩戒慎也家大人曰朱子不信爾雅  
謂是取傳注以作故亦不信繩繩之爲戒慎而意爲之  
解曰繩繩不絕貌余謂首章之振振言其仁厚二章之  
繩繩言其戒慎三章之蟄蟄言其和集皆見毛傳皆稱其子  
孫之賢非徒稱其眾多而已也抑之詩曰子孫繩繩萬  
民靡不承此承上文無易由言無曰苟矣而言言教令  
之出不苟則子孫戒慎守之萬民皆奉行之也故鄭箋  
亦曰繩繩戒也下武篇繩其祖武毛傳曰繩戒也箋曰  
戒慎其祖考所踐履之迹是詩中單言繩者其義亦爲

戒慎

朱傳繩繼也古亦無此訓

故後漢東平憲王蒼引詩作慎其祖

武

見續漢書祭祀志注此所引蓋三家詩

慎與繩聲相近也他若管子宙

合篇曰故君子繩繩乎慎其所先淮南繆稱篇曰秉世

繩繩乎唯恐失仁義然則繩繩之為戒慎自周及漢古

義相承非盤空之訓也。

慎慎勉也

邵曰說文云慎勉也重言之義同引之謹案慎音慕又

音莫

釋文慎慎音慕集韻又未各切亦云勉也

字亦作莫方言倅莫強也北

燕之外郊凡勞而相勉若言努力者謂之倅莫淮南繆

稱篇猶未之莫與高注曰莫勉之也重言之則曰莫莫

小雅楚茨篇說祭祀之事曰君婦莫莫莫莫與悛悛同  
猶言勉勉也。祭義曰君牽牲夫人奠盥。君獻尸夫人薦  
豆齊齊乎其敬也愉愉乎其忠也勿勿諸其欲其饗之  
也。鄭注曰勿勿猶勉勉也。禮器注同勉勉勿勿莫莫一聲之  
轉言君婦當祭之時奉承而進之既忠且敬莫莫然其  
欲其饗之也。毛傳曰莫莫言清靜而敬至也。訓莫莫爲  
清靜則與忠敬異義故又加而敬至三字以足之正義  
亦曰后能清靜恭敬又至篤信未免迂回矣。

夢夢訥訥亂也

注曰皆開駝釋文引顧舍人云夢夢訥訥煩懣亂也。邢

曰。孫炎曰。夢夢。昏昏之亂也。大雅抑篇云。視爾夢夢。邵  
曰。小雅正月云。視天夢夢。楚詞九章云中。悶瞀之怵怵。  
賈誼書先醒篇云。不知治亂存亡之所由。怵怵然猶醉  
也。怵。詭音義同。家大人曰。莊子胠篋篇曰。故天下每每  
大亂。李頤曰。每每。猶昏昏也。案每每。卽夢夢。夢之爲每。  
猶夢之爲甌矣。方言。甌謂之甌。郭注。今字作甌。引之謹案。釋夾。詭。或作  
諄。襄三十一年左傳。且年未盈五十。而諄諄焉如八九  
十者弗能久。參諄諄。眊亂也。言眊亂如八九十人也。說  
左傳。

速速蹙蹙。惟速鞠也。

引之謹案述與尨同說文尨迫也

廣雅同玉篇去牛渠牛二切

故郭

曰賢士永哀念窮迫

今本永譌作求。邢疏曰。惟念也。述急迫也。鞠窮也。言鄙陋小。人專據

爵祿。國士侵削。致賢士永哀。念其窮迫也。今本疏內永字亦譌作求。今據宋單疏本。雪臆本。元本及明吳元恭本。改。此是以念釋惟。以窮釋鞠。以迫釋述也。故釋文曰。述郭云迫也。邵曰。述與求同言。思念所求皆窮困也。此

失述字之義。蓋因釋文述本亦作求而誤。

不通不蹟也不微不道也

郭注不通不蹟也。曰言不循軌跡也。陳氏頤甫曰。不通者。卽邶風日月篇之報我不述也。古毛詩當作報我不述。孫炎云。述字毛傳曰述循也。卽釋詁之述循也。

不蹟者卽。小雅沔水篇之念彼不蹟也。傳曰不蹟不循道也。不徹者卽十月之天命不徹也。傳曰徹道也。不遜不蹟不徹並見於詩。故爾雅統釋之曰不道也。毛公傳義悉本爾雅。今本爾雅不遜不蹟下衍一也字。遂失其指引之謹案。陳說是也。詩報我不述釋文本又作術。文選廣絕交論注引韓詩亦作術。鄭注樂記韋注魯語高注呂氏春秋誣徒篇並云術道也。報我不術者報我不以道也。術與遜通通訓爲道。故爾雅云不遜不道也。楚辭天問昏微遵迹。王注曰迹道也。迹與蹟同。蹟訓爲道。故爾雅曰不蹟不道也。郭所見本不蹟下已衍也字。故



但云不循軌跡而不以不道釋之也。

每有雖也

郭注曰。詩曰。每有良朋。

小雅常棣

辭之雖也。陳氏頌甫曰。爾

雅訓每爲雖。非訓有爲雖也。每下不得有有字。蓋因注而衍。小雅皇皇者華篇。每懷靡及。毛傳云。每。雖。卽本爾雅引之。謹案陳說是也。爾雅訓每爲雖者。合每懷靡及。每有良朋而竝釋之。非專釋常棣詩詞也。故皇皇者華傳曰。每雖。而常棣傳卽蒙上而省。郭因皇皇者華箋不訓每爲雖。至常棣始訓每爲雖。故獨引每有良朋以釋每雖也之義。非謂爾雅作每有也。自唐石經誤增有字。

而常棣箋苒雖也。俗本亦依誤本爾雅作苒有雖也。唯相臺岳氏本無有字。校勘記云。無有字者爲是。箋正用皇皇者華傳也。案皇皇者華正義曰。下篇苒有良朋之下有苒雖之訓。謂常棣箋有苒雖之訓也。則箋作苒雖也。而無有字明甚。箋訓出於爾雅。則爾雅亦無有字可知。玉篇廣韻竝云苒雖也。義本爾雅及毛傳鄭箋而云苒有雖也是其證。

暨不及也

引之謹。案傳注皆訓暨爲及。未有訓爲不及者。不字蓋涉下文蠹不遜也。而衍釋詁曰。逮及暨與也。釋言曰。逮

及也。此曰暨及也。皆是轉相訓傳。注訓暨爲及。卽本於爾雅加一不字。則義不可通矣。郭曰。公羊傳曰。及我欲之。暨不得已。暨不得已。是不得及。此又曲說之不可通者。

恂慄也

瑟兮僴兮。恂慄也。郭曰。恒戰慄。邢曰。謂嚴恂戰慄也。邵曰。禮記鄭注。恂字或作峻。讀如嚴峻之峻。言其容貌嚴栗也。家大人曰。邢兼用禮記注以釋爾雅。故云嚴恂戰慄不。知嚴恂二字義不相屬。邵則畫用禮記注爲解。皆非郭義也。郭云。恒戰慄者。謂慄懼戰慄也。莊子齊物論。

篇民木處則惴惴恂懼釋文恂恐貌崔云戰也是其證  
且恂與慄連文則恂非嚴峻可知

籛條口柔也戚施面柔也

孫郭皆曰籛條之疾不能俯口柔之人視人顏色常亦  
不伏戚施之疾不能仰面柔之人常俯似之因以名云  
家大人曰邶風新臺篇曰籛條不鮮又曰得此戚施毛  
傳曰籛條不能俯者戚施不能仰者鄭箋曰籛條口柔  
常觀人顏色而爲之辭故不能俯也戚施面柔下人以  
色故不能仰也孫郭之說皆出於此今案籛條口柔也  
戚施面柔也此一義也晉語曰籛條不可使俯戚施不

可使仰此又一義也爾雅此條兼釋籀條或施夸毗之義則口柔面柔。自指詩之籀條或施而言非。國語所云也而毛傳乃云不能俯不能仰則豈有衛宣一人而兼此二疾者乎。國語之籀條或施自是人疾之名與口柔面柔之義兩不相涉。鄭箋謂口柔者不能俯面柔者不能仰俱是強爲傳會。口柔者不必仰首面柔者亦不必俯首且面柔之人正欲人之見其顏色不宜於俯首也然則國語爾雅各爲一義不可強同所謂離之則雙美合之則兩傷矣說者或據方言以籀條爲粗竹席或據韓詩說文以或施爲詹諸皆非口柔面柔之義故槩無

取房舍人曰籩條。巧言也。戚施令色也。李曰。籩條。巧言好辭以饒人。是謂口。柔威施和顏悅色以誘人。是謂面柔。皆據本文爲解而不牽引他義。較孫郭爲長。

釋宮

連謂之篠

郭曰。堂樓閣邊小屋。今呼之篠。厨連觀也。家大人曰。移之言移也。移以岐反大傳正義曰。在旁而及曰移。逸周書作雒篇。設移旅楹。孔晁曰。承屋曰移。移與篠古字通。

所以止扉謂之閣

郭注曰。門辟旁長廩也。左傳曰。高其閭閣。閭。長棧卽門。

檠也引之謹案辟與闢同

經傳多以辟爲闢

開也謂門之既開

其旁有長檠以止之使不搖動。今時城門既開。插木檠

於旁以止之。是其遺法也。或於門旁置斲木以止扉。今

人宮室多有之。謂之門塾。亦有代以石者。闔之言格。格

止也。

見張晏漢書梁孝王傳注

檠以止扉。因謂之闔矣。一名閤。玉篇

廣韻並云閤。

他但切。

闔也。門旁檠所以止扉也。郭不直云

門旁長檠。而云門闔旁長檠。則闔以止既開之扉。非以

固既闔之扉。明甚。而顏師古匡謬正俗。乃謂止扉以牢

固。扞禦寇賊。則是以爲闔。樞之屬矣。闔樞以固。既闔之

扉。闔以止既開之扉。不可比而同之也。良由讀郭注未

審以致斯誤耳。

段氏說文注謂閣閉門乃用之誤與顏同。


徐鍇說文繫傳又

云閣今云門頰肩所附箸也亦與止扉之義不合。至左傳高其閤閣當依杜預作閤閤郭所據本作閣乃當時傳寫之誤。止扉之閣自作閤閤之閤自作閤也。辨見左傳高其閤閤下。胡竹邨主政聞余說而遽之曰閣自是止旣開之扉。若止旣闔之扉則當杜門中不當杜門旁。上云櫺謂之闌闌門中所豎短木也。郭注旁長櫺三字蓋對闌之爲中央短櫺言之。



# 門闕長梁圖

外門



長梁 闕 長梁

內門

三達謂之劇旁

郭曰。今南陽冠軍樂鄉數道交錯俗呼之五劇鄉家。犬  
人曰。史記酈生傳曰。陳留者天下之據衝也。據與劇同。  
劇與據聲相近。劇之爲據。猶據之爲振也。史記呂后紀  
見物如若大振高后掖徐廣曰據音戲漢書五行志作  
振

五達謂之康

郭曰。史記所謂康莊之衢。家大人曰。晏子諫篇曰。公趨  
駕追晏子。及之康門。篇曰。桓公過于康莊。聞甯戚歌管  
子輕重。丁篇曰。決瓊落之水。通之杭莊之閒。杭與康同  
釋器

甌瓠謂之瓠

郭曰。甌瓠。小甕。長沙謂之甌。引之謹案。史記貨殖傳。甌

鹽豉千荅。徐廣曰荅。或作合。

今本。合作合。乃後器名。人依漢書改之。

有甌。孫叔然云。

今本作孫叔敖。敖字。亦後人所改。

甌。氏器。受斗六升。合

當爲甌。音貽。案徐所引。卽叔然爾雅注也。列女傳。仁智傳。斂小器投諸合。合亦與甌同。

絢謂之救律謂之分

郭燁上句曰。救絲以爲絢。或曰。亦冒名釋下句曰。律管可以分氣。家大人曰。爾雅言律謂之分。而郭云律管可以分氣。則迂回而失其本。指且如郭說。則此文當入釋

樂不當入釋器矣。今案爾雅於釋羅罔之後卽云絢謂

之救律謂之分二者蓋亦羅罔之屬廣雅於釋羅罔之

後卽云絢謂之輓

輓曹憲音衛輓音帛

則絢亦羅罔之屬輓之言

絢也。拘也。廣雅釋詁曰。輓輓引也。作。絢者。借字耳。救與

絢一聲之轉。或說以此爲冒名。是也。律讀爲率。說文曰

率。捕鳥畢也。

玉篇山律力出二切

畢。田罔也。畢或作畢。廣雅曰。畢

率。也是率。亦羅罔之屬。作律者。借字耳。說詳廣雅疏證

輿革前謂之輓 竹前謂之禦

輿革前謂之輓

胡根反

郭注曰。以韋鞮車轍後謂之第。注

曰。以韋鞮後戶。竹前謂之禦。注曰。以簞衣軾後謂之蔽。

注曰。以簞衣後戶。引之謹案。以韋鞮車軾。詩所謂鞮鞻  
也不。謂之鞮郭注非也。曰前曰後。皆車簞也。玉篇。簞都郎切。車簞  
管。以革爲簞則在前者謂之鞮。在後者謂之鞻。以竹爲  
簞則在前者謂之禦。在後者謂之蔽李。曰竹前謂編竹  
當車前以擁蔽名之曰禦禦止也。是竹前爲車簞之在  
前者革前不當異義鞮之言限也。限隔內外使塵不得  
入也。釋名說車云。立人象人立也。或曰陽門在前曰陽  
兩旁似門也。廣雅曰。陽門蔽簞也。是車簞亦有在前者  
不得以車軾當之。

環謂之捐

郭曰著車厭環家犬人曰環與捐皆圓貌也捐之言圓也。說文圖。音旋規也。規亦圓也。釋魚曰。蝸。蝸郭。彼注曰井中小蝸。蝸赤黠。蝸。蝸猶詰屈也。此蟲行於水中。則掉尾至首。左右回環。其狀曲而且圓。環謂之蝸。猶環謂之捐矣。

鑣謂之轡載轡謂之轡

郭釋上句曰。馬勒旁轡。釋下句曰。車軛上環轡所貫也。釋文。轡。郭。魚。謁。反。轡。郭。音。儀。引之。謹案說文。鑣。馬。衡。也。從金。庶聲。轡。車。衡。載。轡。者。從。車。義。聲。重。文。作。轡。云。轡。或從金。獻。是。轡。爲。轡。之。或。體。而。非。鑣。之。別。名。蓋。許。氏。所。見。

本作鑣謂之銜載轡謂之轡轡字本又作鑣也古聲儀與獻相近故大誥民獻有十夫尚書大傳獻作儀周官司尊彝鬱齊獻酌鄭仲師讀獻爲儀轡或作鑣正古聲之相近而通者也鑣從金者車輶上環以金爲之也不得云鑣謂之鑣徧考漢以前書亦無謂鑣爲鑣者蓋載轡謂之轡別本轡作鑣上與鑣謂之銜相連學者記覽錯亂因誤以鑣爲鑣而易銜以鑣郭氏所據殆誤本也

款足者謂之兩

家大人曰款足謂空足也漢書司馬遷傳實不中其聲者謂之款服虔曰款空也

字或作款莊子養生主篇批大卻道大款淮南原道篇款

者土浮漢書楊王孫傳窆木爲圓  
服皮高誘崔謨注竝曰窆空也管子國蓄篇曰犬國

內款小國用盡內款內空也漢書郊祀志鼎空足曰鬲

蘇林曰鬲音歷足中空不實者名曰鬲卽此所云款足

者謂之鬲也太平御覽器物部二引舍人注曰鼎足相

去疏閒曰鬲義與蘇注同

疏閒蓋疏閒之譌此是釋款字之義故釋文亦云款閒也

邢疏曰鼎足相去疎閒者名鬲蓋

承用舊疏而舊疏又本於舍人也鬲之言歷也鼎足疏

閒歷歷然也

說文秝稀疏道秝也玉篇秝稀疏秝秝然也廣雅曰秝疏也字通作歷文選登徒子

好色賦猋屬歷齒李善注歷猶疎也古詩曰杌星何歷歷

郭以款足爲曲腳失之

### 百羽謂之縶

家大人引穆天子傳曰天子於是載羽百縶

今本縶譌作軍據郭



改注

旄謂之龍音卑

郭曰旄牛尾也。邢曰舞者所執也。引之謹案旄所以飾虞周頌有瞽篇設業設虡崇牙樹羽傳曰樹羽置羽也。正義曰置之於枸虞之上角引漢禮器制度云爲龍頭及頷口。銜璧壁下有旄牛尾是也。故旄謂之龍次於木謂之虡之下。邢說非也。段氏說文注引此以釋旄字。則又誤以爲旌旗之屬矣。集韻龍班糜切。符虞飾引爾雅髦謂之龍較。邢說爲長蓋出孫炎高璉二家義疏也。

不律謂之筆

郭曰蜀人呼筆爲不律也。語之變轉引之謹案不者發聲猶濬謂之不濬。見釋類謂之不類若謂之不若也。見釋魚說文曰楚謂之聿吳謂之不律燕謂之弗秦謂之筆聿律聲相近弗筆聲相近不發聲也不律謂之筆猶言律謂之筆耳。鄭樵注曰緩聲爲不律急聲爲筆其說似是而非。

以蜃者謂之珧

引之謹案楚辭天問曰馮珧利決封矢是射玉注曰珧弓名也決射鞬也。

革中絕謂之辨革中辨謂之鞞

引之謹案革中辨之辨當爲辟字。形相近

漢書蕭何傳秦御史監郡

者與從事辨之張晏曰何與二事備辨。此作辨字解蘇林曰辟何與從事也。此作辟字。解然則張所見本作辨蘇所見本作辟也。又涉上句辨字而誤也。辟與輦皆屈也。辟字

或作褱說文曰誦詰也。一曰屈褱又曰褱輦衣也徐

錯曰輦猶卷也廣雅曰輦誦曲也又曰褱輦誦也鄭注

士喪禮曰以席覆重辟屈而反兩端交於後高注西周

策曰山形屈辟狀如羊腸辟之言辟屈輦之言卷曲也

鄭注大射儀曰爲幕蓋卷辟綴於篠莊子田子方篇曰

辟焉而不能言司馬彪注曰辟卷不開也是辟與卷同

義故革中辟謂之輦也不然辨乃中分之名與輦屈之

義何涉乎。孫注上句曰辨。半分。是也。郭注下句曰復分半。則仍與上句無異。且如郭所言。則正交當云辨中絕。不當云革中辨矣。說文鞞字解曰。革中。辨謂之鞞。辨字恐是後人以誤本爾雅改之也。段氏說文注欲改辨爲辨。音班而。以爲皮之縐文。蹙蹙者。引說文辨駁文也。爲證不知辨乃駁文。非縐文也。仍與鞞字之義無涉。

釋天

在戊曰箸雍

引之謹案箸雍當爲祝黎。說見後大歲攷。

風與火爲庖

郭曰。庖。庖。熾盛之貌。邵曰。易象傳云。風自火出。此釋其名爲庖也。孔疏云。火出之初。因風。方熾。火既炎盛。還復生風。象皆言實事。故爾雅釋之。舊說以爲假象。非也。引之謹案。此釋庖字之義。非釋易之風自火出。蓋誤證也。釋文。庖本。或作炖。字同。玉篇。炖。風與火也。方言。炖。赫。熾也。郭彼注曰。皆火盛熾之貌。然則炖者。火得風而炖。炖然盛。非謂風自火出也。古無炖字。故借庖爲之。

咮謂之桺

咮。謂之桺。桺。鶉火也。郭曰。咮。朱鳥之口。釋文。咮。猶究反。本或作。喙。許穢反。說文云。喙。口也。昌穢反。家大人曰。本

或作喙者啄字。之譌啄卽啄之異文。陸音許穢反。非也。說文。啄。鳥口也。曹風候人篇。維鵜在梁。不濡其啄。毛傳曰。啄。喙也。襄九年左傳。啄爲鵙。火卽此所云啄。謂之桺也。字。或作囁。說文。囁。啄也。玉篇引詩作不濡其囁。召南小星傳三。心五囁。四時更見是也。或作注。考工記梓人以注鳴者。釋文注。陟又反。史記天官書。桺爲鳥注。是也。或作啄。漢書東方朔傳。尻益高者。鶴俛啄也。顏注曰。啄。鳥觜也。音竹救反。又天文志曰。桺爲鳥啄。是也。啄。囁注。啄。古同聲而通用。喙則聲遠而不可通。且。毛傳以喙釋啄。則啄喙之非一字甚明。而漢書天文志。桺爲鳥啄。韓

詩外傳。鳥窮則啄。淮南汜論篇。顏啄歌。今本啄字。並論作喙。爾雅釋文。味。本或作喙。許穢反。文選洞簫賦。嗉。嗉。轉李善注。喙。許穢切。或爲味。都邁切。此啄之誤。讀爲喙者也。說卦傳。爲黔喙之屬。釋文。喙。況廢反。徐丁邁反。曹風候人傳。喙。喙也。釋文。喙。虛穢反。又尺稅反。又陟角反。此又喙之誤。讀爲啄者也。蓋啄喙皆訓爲口。而字形又相似。學者亂之久矣。

彗星爲橈槍

引之謹案。開元占經妖星占篇。引孫注曰。橈槍。妖星別名也。又引尸子曰。彗星爲橈槍。

尸子之文多有與爾雅同者。見爾雅注疏及太

平御

彗星占篇引荊州占曰歲星逆行過度宿者則生  
彗星一日天棊二曰天槍三曰天機四曰彗星此四者  
皆爲彗。是機槍皆彗星之別名。故爾雅曰子竝云彗星  
爲機槍也。然管子輕重丁篇曰國有槍是其君必辱國  
有彗星必有流血浮邱之戰。呂氏春秋明理篇曰其星  
有彗星有。天棊有天機則已分彗與機槍爲三而甘石  
二氏說彗與天棊天機天槍形狀不同。長短亦異。自是  
以後各史志遂相承用之矣。

鎔革鳥曰旗

釋文鎔七各反又七故反

李曰以革爲之置於旄端孫曰鎔

七故反

置也革

紀力反急



也。畫急疾之鳥于綦。周官所謂鳥隼爲旗者矣。

並見公羊傳宣

十二年疏

郭曰。此謂全剝鳥皮毛。

全。今本譌作合。茲從隋書禮儀志及太平御覽兵部

七十一所引。

置之竿頭。卽禮記云載鴻及鳴鳶。太平御覽兵

部七十一引郭氏音義云。按禮記載鳴鳶。鄭元云。載之旌首以示衆。卽此類也。書云鳥獸希革。詩云如鳥斯革。革。鳥者。自是鳥之皮毛明矣。引之謹案。李郭之說皆非也。李解革。鳥云。以革爲之。徧考古。人旗章如交龍熊虎龜蛇之屬。無以革爲之者。非確詁也。郭云。全剝鳥皮毛置之竿頭。卽禮記云載鴻及鳴鳶。其說本於鄭志。鄭荅王贊問。卽禮載青旌以下。云皆舉皮置於旌首。不畫也。

案彼交前有水則載青旌

鄭注青青雀水鳥

前有塵埃則載鳴

鳶前有車騎則載鴻

俗本鴻上行飛字辨見禮記

皆謂畫鳥於旌而

植之車上至前有士師則載虎皮前有摯獸則載貔貅

始謂以其皮飾旌而植之耳

說見禮記

鄭志誤以曲禮之畫

鳥爲舉皮郭氏因之遂以革鳥爲鳥之皮毛如其說則

爾雅當云繒鳥革曰旗文義始順不得顛倒其文而稱

革鳥也曲禮之載虎皮若改爲載皮虎其可乎周官司

常云交龍爲旂龜蛇爲旐不聞剝龍蛇之皮置於竿頭

也且鳶鴻二旌必前有塵埃車騎始載之耳若以旗上

之鳥爲鳶鴻則司常之州里建旗犬司馬之百官載旗



小雅采芑篇。約軼錯衡傳云。錯衡。文衡也。晉語曰。金玉

其車。文錯其服。

文錯猶文繡。韋注訓錯爲錯。失之。

周文王子有錯叔繡

漢書地理志注引世本云錯叔繡交王子。

名繡字錯亦取文理交錯之義然

則錯革鳥者交錯其文爲鳥隼之狀故毛傳曰錯革鳥爲章矣鄭樵曰錯雜以五采也近之。

釋地

其名謂之鰈

邵曰韓詩外傳云東海之魚名曰鰈比目而行不相得

不能達是比目魚本名鰈隸體變轉今作鰈家大人曰

邵說非也邵以說文無鰈字

新附字有之

又以韓詩外傳作

鰈遂謂鰈爲鰈之譌。今考說文狝字解云。大倉也。從大

舌聲。

今本作从大从舌。乃徐鉉不知古音而妄改之。茲據繫傳本訂正。

讀若比目魚鰈

之鰈。

主篇廣韻狝鰈二字並與榻同音。

則是說文原有鰈字而寫者脫

之也。鰈爲其魚魴鰈之鰈。與比目魚鰈之鰈。聲義縣殊

不得以鰈爲鰈。遍考書傳亦無謂鰈爲比目魚者。竊謂

鰈乃鰈之譌。釋文曰鰈。本或作鰈。玉篇鰈。比目魚鰈同。

上。

列子說符篇傳者射明張中。反兩槍而笑。張湛注曰。射五白得之。反兩魚獲勝。故大笑。殷敬順釋文曰。槍

大博經作鰈。比目魚也。案槍卽鰈之俗字。

是鰈爲鰈之別體。故爾雅作鰈。韓

詩外傳作鰈。鰈與鰈相似。傳寫者遂誤爲鰈耳。當據爾

雅或本之鰈以正。外傳鰈字之譌。豈可反據外傳之誤

字以改爾雅之正文乎

邑外謂之郊郊外謂之牧牧外謂之野野外謂之林林外謂之垌

邵曰魯頌毛傳云邑外曰郊郊外曰野野外曰林林外曰垌說文云邑外謂之郊郊外謂之野野外謂之林林外謂之垌或作垌俱据爾雅爲說無郊外爲牧之文然詩疏及爾雅釋文引李巡孫炎舊注俱有此文毛許所引蓋異本也引之謹案無郊外爲牧者蓋舊本也毛於召南之野有芣芣邶風之燕燕鄘風之干旄並傳云郊外曰野又邶風野有蔓草傳云野四郊之外說文云野

郊外也。皆不云牧外。曰野。鄭注牧誓及鄭風之叔于田。周官甸師。遂人。士師。縣士。並云郊外曰野。高注呂氏春秋季春紀淮南時則篇。並云廣平曰原。郊外曰野。詩二皆出爾雅。韋注晉語亦云郊外曰野。皆用爾雅之文。而不去在牧外。小雅出車首章。手彼牧矣。毛但云出車就馬於牧地。而不云在郊外。次章。于彼郊矣。鄭云乘馬牧地在遠郊。據周官載師以牧田任遠郊之地而言。而不云郊外。謂之牧。周語國有郊牧。韋注云國外曰郊。牧放牧之地。而不云牧在郊外。是毛許鄭高韋所見爾雅本皆無郊外。謂之牧也。孫本郊下有牧。李本牧作田。皆非爾雅。

之舊蓋當時學者所增也。

釋邱

方邱胡邱

引之謹案水經汝水注曰汝水又東南逕壺邱城北故陳地春秋左傳文公九年楚侵陳克壺邱是也壺邱蓋卽胡邱此亦地以邱名若桑邱咸邱之類。

當途梧邱咸途出其前戴邱途出其後昌邱

家大人曰梧邱戴邱昌邱皆取相當值之義梧圉禦三

字古通用故強禦或作強圉

見楚辭離騷及漢書王莽傳敘傳

或作強

梧

釋天犬歲在丁曰強圉史記歷書作強梧

梧之言禦也秦風黃鳥傳及齊



語注並云禦當也。故邱之當途者謂之梧邱。釋名曰。當途曰梧邱。梧忤也。與人相當忤也。有邵義亦同矣。戴之言值也。值亦當也。釋地曰。距齊州以南戴曰爲丹穴北戴斗極爲空桐郭。彼注曰。戴值喪。大記君纁戴六。鄭注曰。戴之言值也。所以連繫棺束與柩材使相值。是戴爲當也。故邱之前當途者謂之戴邱。釋詁曰。昌當也。故邱之後當途者謂之昌邱。當途梧邱之途縱言之也。途出其前後之途橫言之也。而梧邱戴邱昌邱皆以其與途相當值名之。

水出其左營邱

爾雅注疏校勘記曰。水出其左營邱。唐石經及各本並同。史記祠本紀集解禮記檀弓正義皆引作水出其前。而左曰營邱。水經淄水注引作水出其前左爲營邱。又云營陵城南無水。惟城北有一水。世謂之白狼。水面出丹山東北流。由爾雅出前左之文。不得以爲營邱矣。今臨淄城中有邱淄水出其前。家大人曰前下脫左字故有營邱之名。與爾雅相符。邵氏正義據此謂舊本爾雅經有前字。注云淄水過其南及東東南二字。正義釋前左二字。然考詩齊譜正義引孫炎注爾雅云。水出其左營邱。無前字。經文水出其前後左右四字相對。與下左高咸邱右高

臨邱前高旄邱後高陵邱文法略對劉熙釋名本爾雅亦言水出其左曰營邱蓋史記水經注等蒙上水出其前濱邱之文引之王氏穀勝云凡古人祇言左右者皆據前言之猶言東西亦據前言之若對文則並舉如釋菑言馬有前右後右前左後左矣此言水出其左謂水出其前左也引者加前字須人易曉耳家大人曰此說非也此文本作水出其前而左營邱營者環也水環其前與左也若但言水出其左則營字之義不見孫炎郭璞何以皆言水過其南及東乎古人屬文不必字字相對若但齊其文而不顧其義則以小害大矣上文遂出

其右而還之畫邱。途出其前戴邱。途出其後昌邱。首句

亦多而還之三字。然去此三字。則畫字之義不見。郭注言爲

道所規畫亦猶水出其前而左營邱去前而二字。則營字之

義不見也。據王說云。凡古人祇言左右者。皆據前言之。

水出其左。謂水出其前左也。然則水出其右。亦謂水出

其前右乎。渚邱汨邱正邱皆一面有水。唯營邱兩面有

水。故言水出其前而左。豈得謂凡言左右者。皆據前言

之乎。左高咸邱。右高臨邱。左澤定邱。右陵泰邱。皆非謂

前左前右也。而謂水出其左。卽水出其前左。豈其然乎。

若謂引爾雅者加前字。須人易曉。則尤爲曲說。史記集

解及水經注禮記正義所引皆有前字。

集解正義所引前下皆有而字。

是也。齊之營邱淄水先過其前而後過其左。故曰水出其前而左。與遂出其右而還之文同一例。水經注無而字者。省文耳。然而字可。豈皆欲人易曉而加之乎。水經省前字則斷不可省也。

注又曰營陵唯城北有一水。由爾雅出前左之文不得以爲營邱矣。云爾雅出前左之文則是爾雅原有前字。非善長欲人易曉而加之也。若爾雅但言水出其左則諸君又何以知其爲前左而加前字以曉人乎。元和郡縣志亦曰爾雅曰水出其前經其左曰營邱。自開成石經始脫前而二字。而各本皆沿其誤。若詩正義無此二字。卽後人依誤本爾雅刪之不得援以爲據。

案詩正義曰水所營

繞故曰營邱釋邱云水出其左營邱孫炎曰今齊之營邱淄水過其南及東是也南東二字正義上言水所營繞下引孫注孫本有前而二字可知正義亦有前而二字可知後人刪過其南及東則所引經文亦有前而二字可知後人刪此二字則上下文皆不可通矣禮記正義曰釋邱云水出其前而左曰營邱以水營遶故曰營邱說與詩正義同故知詩正義亦有前而二字而後人刪之也若釋名無此二字則不足為據上文途出其右而還之畫邱釋名無而還之三字豈得謂爾雅亦無此三字乎

### 邱背有邱為負邱

郭曰此解宛邱中央隆峻狀如負一邱於背上家大人曰郭說非也邱背有邱者謂邱之後又有一邱如背有所負然故曰負邱負亦背也廣雅曰背負後也釋名曰負背也置項背也曲禮負之背也秦策齊東負海北海倚河高注曰負背也負與

背古同聲而字亦相通又通作倍史記魯世家南面倍  
依以朝諸侯倍依卽負依主父偃傳南面負展漢書負  
作背漢書高紀項羽

背約史記背作負

邱背有邱爲負邱宛中爲宛邱二

者迴不相涉郭不解負字之義而以爲宛邱中央隆峻  
狀如負一邱於背上遂與上文之宛中宛邱下文之邱  
上有邱爲宛邱混爲一義其失甚矣邵曰邱背有邱疑  
於後高陵邱郭以邱背卽邱上故定爲重釋宛邱之義  
此曲爲之說也後高陵邱謂邱形後高而前卑耳非邱  
背有邱之謂也且上言邱背有邱下言邱上有邱則邱  
背之非邱上明矣邵又曰說文云𨾏邱名武負聲相近  
𨾏邱卽負邱也尤爲皮傳之說

負古讀若倍聲與𨾏不  
相近且說文但云邱名

何以知其爲邱背  
有邱之負邱平。

### 望厓洒而高岸

郭曰。洒謂淡也。視厓峻而水淡者曰岸。家大人曰。郭說  
非也。洒者峭也。語之轉耳。邢風新臺篇。新臺有洒。毛傳  
曰。洒高峻也。峻亦峭也。水厓之形有直立而卑者是峭  
而不高者。也有高而陵夷者是高而不峭者也。若旣峭  
而又高者。則謂之岸。曰望厓洒而高。則洒字自指厓言  
之。而郭乃以爲水淡。望厓水淡而高。則文不成義矣。且  
厓峭而高。卽謂之岸。何必水淡而後謂之岸乎。郭益以  
洒字從水。故訓爲水淡。此未達六書假借之義也。  
洒濯之洒



借爲洒 新臺有洒之洒。豈亦得訓爲水淡乎。邵曰。洒字  
峻之洒。從水面聲。而與申聲相近。又轉爲淡。是從聲取義。此則  
曲說之不可通者也。

### 夷上洒下不滯

李曰。夷上平上洒下隋下。故名滯。孫口平上隋下。故名  
日滯。不者蓋衍字。郭曰。厓上平坦而下水淡者爲滯。不  
發聲。家大人曰。郭以不爲發聲是也。以洒下爲厓下水  
淡則非。滯爲水厓之名。不必水淡而後謂之滯也。夷上  
洒下。皆指厓而言。與水之淡淺無涉。夷者陵夷也。陵夷  
者。陂陀也。見家語始誅篇注。洒者峭也。言上陂陀而下峻峭也。

魏風伐檀釋文曰。濬本亦作屑。濬之言屑也。上陂陀而下峻峭。狀如人之屑。故謂之濬。是以李孫竝云。平上隋下。故名濬也。若以洒爲水。濬則非其指矣。

厖內爲隩。外爲隈。

隩隈厖內爲隩。外爲隈。邢曰。云外爲隈者。隈當作鞫。傳寫誤也。詩大雅公劉云。芮鞫之。卽毛傳云。水之外曰鞫。案此誤以然。則厖在水。曲其內名隩。又名隈。其外名鞫。箋爲傳。

又作坵。音義同。今以隩隈一事分爲外內之名。故知誤也。邵依邢改隈爲鞫。云詩疏引爾雅作鞫。陸氏爾雅釋文亦作鞫。今本作隈。說文云。澳隈厖也。其內曰澳。其外

曰隈。是爾雅舊本。亦作隈。釋文引字林作坵云隈。屋外也。左傳疏引爾雅亦作隈。唐石經及宋本俱作鞫。與陸氏釋文同。今定從陸。本家大人曰。邢邵說是也。今檢唐石經及宋本皆作外爲隈。蓋唐石經始作隈。隈字卽涉上文隈隈而各本皆從之。故邢疏特辨其誤。邵謂唐石經宋本俱作鞫。蓋偶未檢耳。然恐後人轉據石經宋本及今本說文左傳疏以相難。故明辨之。案孫炎曰隈。水曲中也。淮南覽冥篇漁者不爭隈。高注曰隈。曲溪處魚所聚也。列子黃帝篇河曲之淫隈。殷敬順曰隈。水曲也。此皆謂屋內爲隈。非謂屋外爲隈也。又案大射儀大射正執弓

以袂順左右。隈鄭注曰隈弓淵也。僖二十五年左傳秦人過析隈。杜注曰隈隱蔽之處。莊子徐無鬼篇奎蹄曲隈。向秀曰曲隈股閒也是。凡言隈者皆在內之名。非在外之名。厓外而謂之隈必無是理也。且上文云隩隈是隈卽隩也。乃又云厓內爲隩外爲隈不自相違戾乎。今本說文作其外曰隈。左傳疏引爾雅作外爲隈皆後人以俗本爾雅改之。考古者固貴有定識也。說文隩水隈厓也隈水曲也。則明明以厓內爲隈矣。隈卽隩也。故曰其內曰隩。其外曰隩。今改爲其外曰隈則與隩隈二字之注皆不合。閱二年左傳注水之隈曲曰汭正義曰釋邱云隩隈厓內爲隩外爲隩彼雖不言內內卽隩也而內字以內爲聲明是水之隈曲之內也。據孔云水之隈曲之內則厓內爲隈甚明。故引爾雅以釋杜注水之隈曲曰汭也。今

改外爲鞠曰外爲隈。則既與疏意不合。又與注意相反矣。襄三年正義引爾雅。厓內爲隈。外爲鞠。李巡曰。厓內近水爲隈。外爲鞠。今本爾雅字皆作隈。亦是後人所改。而爾雅釋文則曰。鞠。字林作坑。云隈。厓外也。九六反。公劉箋則曰。水之內曰隈。水之外曰鞠。正義則引爾雅曰。厓內爲隈。外爲鞠。又引李巡曰。厓內近水爲隈。其外爲鞠。皆足正後人校改之謬。

### 畢堂牆

李曰。崖似堂牆曰畢。郭曰。今終南山道名畢。其邊若堂之牆。引之謹案。自望厓。洒而高岸至谷者。激皆釋水邊厓岸之名。不得雜以山閒之道。且畢爲道名。以在上者言之。牆爲堂邊。以在旁者言之。又不得謂在上之畢爲在旁之牆也。郭蓋以詩終南有終有堂。毛傳云。堂畢道。

平如堂也。箋云：畢終南山之道名，邊如堂之牆然。故本之而爲此注。案：紀堂乃杞棠之偕字，不得如。毛鄭所釋說見前。有紀有堂下。且尋繹毛義畢道平如堂，蓋本釋山山如堂者，密之文。密畢聲相近，毛所見本密蓋作畢也。故言堂而不言牆，其非用畢堂牆爲說明矣。自鄭申毛義始，誤以畢堂牆說之，而謂如堂之牆耳。今案畢堂牆之堂，當讀爲陂。唐之唐，史記魏世家倉唐古今人表作倉堂後漢書延篤傳唐溪典注以爲堂谿氏。唐，隄也。牆謂隄內一面障水者，以其在水之旁，故謂之牆。又謂之畢牆之言將也。大雅皇矣篇：在渭之將。傳曰：將，側也。釋名曰：輿棺之車，其旁曰牆，似屋牆也。是牆爲

在旁之名也。畢之言蔽障蔽水，使不外出也。說文曰：牆垣蔽也。唐牆蔽水，故謂之畢矣。郊特牲謂之水庸，庸亦牆也。庸，庸古字通。畢爲水厓，故與諸水厓之名連類而舉矣。

涘爲厓窮續汜谷者激

家大人曰：此篇自望厓，灑而高岸以下，皆釋厓岸之名。故篇末題曰厓岸。此云涘爲厓窮續汜，谷者激者言水厓謂之涘，其窮續之厓則謂之汜，通谷者之厓則謂之激。汜激皆厓岸之名，非溝瀆之名也。對文則汜與激異，散文則通。故廣雅曰：涘，厓也。涘與激同。見淮南道應篇。公孫龍至於河上而航在一汜。高注曰：汜，水厓也。班

固幽通賦。羣彊大於南汜。曹大家注與高誘同。是汜爲

厓也。

顧命夾兩階凡二氏傳堂廉曰凡堂邊謂之凡。亦謂之廉水厓。謂之隙亦謂之汜。其義一也。釋

文曰。激本又作濬。悲反。釋水篇水。草交爲濬。釋文曰。

濬本。或作激。悲反。則濬激是一字。釋名曰。濬。濬也。臨

水。如肩臨目也。秦風蒹葭篇在。水之濬。毛傳曰。濬水廉

也。說文曰。濬厓也。是濬爲厓也。汜與濬皆厓岸之名。故

廣雅濬汜同訓爲厓。義本於爾雅也。而郭釋窮瀆汜曰。

水。無所通者。釋谷者。激曰。通於谷。

水經濟水注引正文作通谷者。激引注文。

作水通。

則是以前窮瀆爲汜。通谷者爲濬。說文亦曰。汜窮

瀆也。若然。則汜濬當與谿谷溝瀆同列於釋水。胡爲與



涓澳墳渙同列於釋邱而總之以厓岸之名乎斯不然矣。

釋山

山小而高岑

家大人曰管子宙合篇曰山陵岑巖淵泉闕流孟子告子篇可使高於岑樓趙注曰岑樓山之銳領者。

重甌

魚楚反 廉魚檢反

李曰隤阪也

見三風葛藟釋文。

孫曰山基有重岸也郭曰謂山

形如累兩甌甌甌上大下小

各本脫下四字今據葛藟釋文及公劉正義引補。

山狀似之因以名云引之謹案孫說是也下文左右有

岸。厓與此句相連皆謂山之厓岸也。說文云：「厓，厓也。」釋

邱云：「重厓岸。」此云：「重厓。」陳文義相合，皆厓岸之名也。厓者

厓之高而峻者也。故釋畜云：「騷蹄野善厓厓。」司馬相如

上林賦云：「巖厓，厓崎嶇。」亦巖也。厓與崎皆邪

也。厓之言述，崎之言敬也。巖厓與厓崎對文，巖厓雙聲

也。厓崎疊韻也。推麥疊韻也。厓崎雙聲也。解者多失之

但不重者謂之厓。重者謂之厓耳。厓當讀爲厓。說文厓

岸高也。從山厓。呼早切。厓亦聲。玉篇：「牛，牛割二切。」廣韻

又語偃切。語偃之音與厓同。厓正字也。厓，俗字也。郭未

達俗字之義，而以爲山形如累兩厓。案釋邱云：「如覆敦

者敦邱。」又云：如藥者藥邱。如階者階邱。此篇亦云：山如堂者密，如防者盛。重厓之厓若

果爲厓，則當云如重厓者厓。文義乃明，何得徑省其文

而云重甌。甌乎。釋名云。山上大下小曰甌。是也。而云甌。甌也。甌一。孔者甌形。孤出處似之也。則已誤以爲山形。如甌矣。字林亦云。陳山形似重甌。郭注之誤。蓋本於二書也。

### 左右有岸屈

釋文屈口閭反

今本閭誤作閭。據明葉林宗影鈔宋本釋文改。

錢曰。屈蓋屢字

之譌。說文屢閉也。山左右有岸。似戶之閉。故以得名。俗

師不通六書。誤作屈。或作厓。

見廣韻

皆非也。段曰。屈當作

厓。文選江賦鼓厓窟以澎湃。李善注厓。苦合切。是也。家大人曰。二說皆未安。說文屢閉也。左右有岸。非閉之義。

江賦。鼓唇。屈以泐泐。李善注。唇亦屈之類也。集韻。唇。壓也。或作唇。皆非。左右有岸之義。今案。屈。本作厶。從厂去聲。非從缶。聲。廣韻。厶。去劫切。厶。厶。集韻。厶。厶。也。或作。厶。去劫。與口。閣聲相近。訓。厶爲厶正。合左右有岸之義。且集韻云。厶。或作。厶。則。厶爲厶之誤明矣。厶之言厶也。廣韻。厶。厶。去劫切。人左右脅謂之厶。說文。厶。掖下也。去劫切。廣雅。厶。脅也。山左右有岸謂之厶。義相近也。篆書。厶字作厶。厶字作厶。厶字作厶。二形相似。隸書。厶字作厶。厶字作厶。厶亦相似。故從厶。從厶之字。傳寫多誤。管子。輕重甲篇。三月解。甸。甸字作厶。漢冀州從事張表碑。復攸陶父陶字作陶。此從厶之。

字而誤從去者也。亦有從去之字而誤從缶者。說文磬鼓磬聲。從鼓缶聲。土盍切。磬乃鑿字之誤。玉篇亦誤作磬。後人又加鑿字。音七盍切。而不知磬卽鑿之誤也。此如集韻之廣韻有鑿無磬。是其證矣。又墨子備蛾傅篇。屈屈兼收以爲法程。今本作湣程。此皆從去之字而誤從缶者也。怯怯從去聲而音去劫切。劫鉞從去聲而音居怯切。鑿從去聲而音土盍切。屈屈從去聲而音口荅切。其義同也。屈之爲屈。鑿之爲磬。法之爲湣。其誤亦同也。

### 山上有水埒

引之謹案。列子湯問篇。壺領山頂有水涌出。一源分爲

四埒注於山下。張湛曰。山上水流曰埒。是也。郭曰。有淳泉。於義未允。

釋水

洸泉穴出。出仄出也。

李曰。永泉從彡。出名曰洸。洸側出。

側與仄同。案正文已云。穴出仄出也。則注

不須更言側出。側出疑側也之譌。

引之謹案。泉皆自穴中出。而洸泉獨

言穴出者。穴非孔穴之穴。乃回穴之穴也。文選幽通賦

叛回穴。其若茲兮。李善引曹大家注曰。回邪也。穴僻也。

又引韓詩曰。謀猶回穴。

毛詩作回。通傳亦曰。回邪。通宋辟釋云。曰通韓詩作欸。義同。

玉風賦曰。回穴錯迕。後漢書盧植傳曰。今之禮記特多

回穴義竝與此同然則邪謂之回僻謂之穴僻者偏也  
沕泉從旁出故曰穴出又曰仄出案車軸兩端自轂中出者謂之軌亦是從  
旁出也故釋名曰側出曰沕泉  
沕軌也流狹而長如車軌也  
穴與仄皆不正之名與  
上文濫泉正出相對非謂其從孔穴中出也邵引說文  
沕水從孔穴疾出也段注沕字引爾雅沕泉穴出皆失  
之說文沕字之訓別爲一義非沕泉穴出之穴沕泉穴  
出謂旁出也不然泉皆出自穴中豈獨沕泉乎沕說  
文作屮云仄出泉  
也  
不云從孔穴出

漢大出尾下

郭曰尾猶底也引之謹案凡泉莫不有底水皆自下而  
上何獨於漢而言出尾下乎且尾者後也未也泉之有

底。水所自出。乃其始也。本也。不得謂之曰尾。遍考書傳。無謂水所自出爲尾者。況上出與下出不同。莊子秋水篇。天下之水莫大於海。尾閭泄之。列子湯問篇所謂無底之谷。不知何時已而不虛。蓋海水自穴中下出。有若腹中之物泄於尾閭者然。故謂之尾若。漢水潰涌上出。則與尾閭之下泄者異矣。何得謂之尾乎。郭說非也。今案漢大出當絕句。尾下當自爲一。義不與上相屬。漢大出者承上出同流而廣言之。謂之大出者潰涌上出其勢甚大也。上文云。檻泉正出。沃泉縣出。沆泉穴出。此云漢大出。文義正相合矣。尾下者承上歸異而廣言之。歸於他水者水



之尾也。尾者下游也。故舉尾之名而釋之曰下。昭十二年左傳楚子狩于州來。次于潁尾。杜注曰潁水之尾。杜下蔡西。水經潁水至慎縣東南入于淮。注引春秋次于潁尾而釋之曰蓋潁水之會淮也。是水之下游。謂之尾也。灤水注引諺曰高粱無上源。清泉無下尾。是下游曰尾。後世方俗語猶然解者。乃以大出尾下連讀失其義矣。

以衣涉水爲厲

引之謹案厲謂陵水而渡也。或以厲爲橋者非。說見溪則厲下。

繇膝以下爲揭

引之謹案。此六字蓋唐以前學者所增。非爾雅原文也。爾雅曰。繇膝以上爲涉。謂濟水之時。水濡至膝。又過膝而上也。又曰。繇帶以上爲厲。謂水濡至帶。又過帶而上也。蓋涉水者。由淺入深。故水之濡體。由下而上。漸無先濡上而後濡下之理。可云繇膝以上。繇帶以上。不可云繇膝以下也。後世學者。見涉與厲分言淺深之度。而揭獨不言。以爲闕略。乃依繇膝以上爲涉之文。而增繇膝以下爲揭。而不知其義不可通也。詩匏有苦葉。傳曰。由膝以上爲涉。又曰。以衣涉水爲厲。謂由帶以上也。又曰。

揭。褰衣也。即揭衣。皆用爾雅之文而獨不及由膝以下為

揭。則所據爾雅本無此一句可知。正義曰。傳不引爾雅

耳。案古本爾雅無此句。故傳不引。非略也。皇侃論語憲問篇疏引爾雅云。繇

膝以下為揭。則此句之增已久。不始於陸氏釋文矣。釋文

則揭起列反。  
下為揭同。

### 紼紼也

釋文。紼。本或作紼。紼。本或作紼。家大人曰。紼。紼聲之變

轉也。紼之為紼。猶吳謂筆為不律。不律。律也。不發聲說

而燕謂之弗也。引棺索謂之紼。亦謂之紼。鄭注。檀弓曰。日

盧下棺以紼繞正。義曰。紼即紼也。喪犬記。君葬用輜。四

紼。二碑注曰。紼或為率。率與紼同。釋名曰。從前引之曰

紉縣。下。維舟索謂之繫。亦謂之紉。其義一也。邵引說文  
壙曰。緯。紉。亂系也。繫。素屬皆失之。二者皆非繩索

經義述聞弟二十七